

2007 Outline para sa Panahon sa Pagpakigbahin [Sharing Time]  
ug sa Pasundayag sa mga Bata sa Sakrament Miting

## MOSUNOD AKO KANIYA SA HUGOT NGA PAGTUO

*“Ug sud-onga, siya mianhi nganhi sa iyang mga katawhan, nga ang kaluwasan unta modangat ngadto sa mga katawhan gani pinaagi sa hugot nga pagtuo sa iyang ngalan” (Mosiah 3:9).*



**MGA INSTRUKSYON NGADTO SA MGA  
LIDER SA PRIMARY ALANG SA PANAHON  
SA PAGPAKIGBAHIN [SHARING TIME] UG SA  
PASUNDAYAG SA MGA BATA SA SAKRAMENT MITING**

**MENSAHE NGADTO SA MGA  
KAPANGULOHAN SA PRIMARY**

*Karong tuiga sa panahon sa pagpakigbahin, atong itudlo ang usa ka sukaranan nga baruganan sa Ang Simbahan ni Jesukristo sa mga Santos sa Ulahing mga Adlaw—hugot nga pagtuo diha ni Ginoong Jesukristo. Ang atong tuyo mao ang paghatag sa mga bata og mga kasinatian nga makapakabig kanila, makakaplag sa ilang kaugalingong hugot nga pagtuo ug pagpamatuod, ug makahimo og mga pasalig sa pagsunod sa Manluluwas ug magsunod sa Iyang ebanghelyo. Samtang mag-andam kamo sa mga panahon sa pagpakigbahin, palihug paghunahuna og mga paagi nga makapaambit sa binulan nga mga tema ug mga kasulatan uban sa mga pamilya sa mga bata sa Primary. Kami mopamatuod nga si Jesukristo mao ang gisaad nga Manluluwas ug nga sa atong pagtudlo sa mga bata nga mosalig Kaniya sa ilang tibuok mga kasingkasing, Siya mopanalangin kanila, “ug dako ang pakigdait sa inyong mga anak” (Isaias 54:13). Gimahal namo kamo ug nag-ampo alang kaninyo.*

*Ang Kinatibuk-ang Kapangulohan sa Primary*

**MGA INSTRUKSYON ALANG SA  
PANAHON SA PAGPAKIGBAHIN**

Ang panahon sa pagpakigbahin molungtad og 30 ka minuto nga makahatag og kahigayunan sa gitipon nga mga bata nga ka-edad sa pag-apil sa angay nga mga kalihokan sa adlaw nga Igpapahulay ug manganta og mga awit nga magtudlo og mga baruganan sa ebanghelyo.

Ang mosunod nga mga sumbanan makatabang sa pagplano sa mga panahon sa pagpakigbahin:

- Tun-i kining maong dokumento sa dili pa magsugod ang tuig.
- Itudlo ang mga baruganan niini nga *outline*.
- Paningkamot nga madasig samtang ikaw magplano sa sinemana nga mga panahon sa pagpakigbahin.
- I-apil ang lider sa musika sa imong pagplano. Gamita ang musika sa tibuok panahon sa pagpakigbahin aron mapalig-on ang mga baruganan nga gitudlo. Hatagi og igong panahon ang lider sa musika sa pagtudlo og bag-ong musika ug sa pagtabang sa mga bata nga malingaw sa pagpanganta.

- Hisguti ang mga pamaagi nga imong matudlo ang sinemana nga baruganan sa ebanghelyo. I-apil ang mga bata, ug tabangi ang mga bata nga makagamit sa baruganan sa ebanghelyo sa ilang mga kinabuhi. (Tan-awa sa “Mga Paagi sa Pagtudlo” sa pahina 13.)
- Pangita og mga paagi sa pagdala sa mga bata ngadto sa mga kasulatan sa inyong pag-abli niini, sa pagtudlo gikan niini, ug sa pagpamatuod niini sa panahon sa pagpakigbahin matag semana.
- Isulat ang imong plano diha sa kopya sa “*Work Sheet* sa Pagplano sa Panahon sa Pagpakigbahin” nga anaa sa pahina 12.
- Desisyoni kinsa sa kapangulohan ang motudlo o modumala sa matag semana nga panahon sa pagpakigbahin.
- Himoa nga kausa sa usa ka bulan nga pasundayag sa klase [*class presentation*] ang panahon sa pagpakigbahin. (Tan-awa sa “Mga Pasundayag sa Klase” sa pahina 13.)

**MGA SUMBANAN ALANG SA  
PASUNDAYAG SA SAKRAMENT MITING**

Ubos sa direksyon sa bishop o branch president, ang pasundayag sa sakrament miting sa mga bata ipresentar atol sa ikaupat nga kwarter sa tuig. Ang mga bata mopakigbahin sa unsay ilang nakat-unan mahitungod sa tema niining tuiga, “Mosunod Ako Kaniya sa Hugot nga Pagtuo.” Ang pasundayag sa sakrament miting kinahanglan dili molapas sa 40 ka minuto ug kinahanglang magsunod sa mga lagda ug mga sumbanan alang sa mga sakrament miting. Usa ka sakop sa bishopric o branch presidency kinahanglan motapos sa miting uban sa pagsulti og gamay nga magpamatuod sa mga baruganan nga gitudlo sa pasundayag. (Tan-awa sa *Tamdanan nga Basahon sa mga Panudlo sa Simbahan, Basahon 2: Mga Pangulo sa Pagkapari ug Kaabag* [1998], 237.)


Ang mosunod nga mga sumbanan makatabang usab sa pagplano sa pasundayag sa sakrament miting:

- Pakigkita sa bishop o branch president sa sayong bahin sa tuig aron hisgutan ang pasiunang mga plano. Kuhaa ang iyang pagtugot kon mahuman na ang mga plano.

- Planoha nga ang mga bata mopasundayag sa programa base sa binulan nga mga tema sa panahon sa pagpakigbahin.
- Sa tibuok tuig, pagtipig og mga sinulat sa mga pakigpulong ug mga kasinatian sa tagsa-tagsa ka mga bata nga posibling magamit sa pasundayag.
- Pagplano sa paggamit og lainlaing mga paagi sa pasundayag: mga kasulatan, personal nga mga kasinatian, tinagsa o grupo nga pagbasa, ug mga pagpamatuod.
- Sa pagpasundayag sa musika, mahimo ninyong i-apil ang tibuok koro sa Primary, koro sa dagko ug gagmay nga mga bata, mga bata nga mo-*solo*, mag-*duet*, gamay nga grupo sa mga bata, ang kongregasyon, ug angay nga duyog nga instrumento.
- Planoha ang mga pagpraktis nga dili kini maka-balda sa klase ug sa pamilya.

PASABUT SA MGA SIMBOLO UG  
MGA MINUBO [ABBREVIATIONS]

Ang mosunod nga mga simbolo ug mga minubo gigamit sa tibuok *outline*:

	<i>Musika</i> . Kini nga mga kanta nag-suporta sa tinuig nga tumong ug girekomendar alang sa pasundayag sa sakrament miting.
<b>HAB</b>	<i>Mga Himno ug mga Awit sa mga Bata</i>
<b>PHE</b>	Pakete sa mga Hulagway sa Ebanghelyo
<b>BE</b>	<i>Mga Baruganan sa Ebanghelyo</i>
<b>“Akong mga Sumbanan sa Ebanghelyo”</b>	Mga sumbanan nga basahon sa <i>Hugot nga Pagtuo sa Dios</i> , luyo nga hapin
<b>Outline sa Panahon sa Pagpakigbahin</b>	<i>Outline para sa Panahon sa Pagpakigbahin ug sa Pasundayag sa mga Bata sa Sakrament Miting gikan sa nangaging tuig</i>
<b>Litrato</b>	Mga pakete sa litrato sa manwal sa Primary
<b>“Pamahayag”</b>	“Ang Banay: Usa ka Pamahayag ngadto sa Kalibutan.” <i>Ensign</i> , Nob. 1995, 102

MGA LITRATO

Ang mosunod nga mga litrato sa PHE nga gihimong pakisayran sa *outline* niining tuiga alang sa panahon sa pagpakigbahin. Ang kadaghanan niini adunay tugbang nga litrato sa usa sa mga pakete sa litrato sa manwal sa Primary.

<i>Mga litratosa PHE ug paghulagway</i>	<i>Tugbang nga mga litrato sa mga pakete sa litrato sa manwal sa Primary</i>
119—Adan, Eva, ug pamilya	1-34, 3-5
200—Ang Pagkatawo ni Kristo	1-75, 2-41, 4-10, 6-50, 7-3
208—Bunyag ni Kristo	1-18, 2-19, 3-1, 7-7
215—Pag-ayo sa anak nga babaye ni Jairo	2-25, 7-18
216—Kristo ug mga bata	2-35, 3-56, 7-24
238—Kristo sa Ikaduhang Pag-anhi	2-65, 3-15, 4-49, 5-28, 6-28
301—Lehi mibiya sa Jerusalem	3-40, 4-5
313—2,000 ka batan-ong manggugubat	1-65, 3-38, 4-40
321—Alma ang Batan-on	4-26
322—Kristo ug ang Nephite nga mga bata	1-64, 2-36, 3-61, 4-47
325—Bulawan nga mga palid	5-13
502—Templo sa Salt Lake	1-54, 5-55
504—Bunyaganan sa Templo	5-36
601—Bunyag	1-11, 3-13
602—Kumpirmasyon	2-30, 3-14
603—Pagpanalangin sa Sakramento	
604—Pagpaambit sa Sakramento	1-8, 2-29
611—Ang bishop	
612—Mga misyonaryo	3-69
613—Pagpangalagad sa masakiton	1-40
614—Home teaching	

## MOSUNOD AKO KANIYA SA HUGOT NGA PAGTUO

*“Ug sud-onga, siya mianhi nganhi sa iyang mga katawhan, nga ang kaluwasan unta modangat ngadto sa mga katawhan gani pinaagi sa hugot nga pagtuo sa iyang ngalan”  
(Mosiah 3:9).*

*Tumong: Aron sa pagtabang sa mga bata nga molambo ang ilang hugot nga pagtuo ni Ginoong Jesukristo ug motubo ang ilang pasalig nga molihok sumala nianang hugot nga pagtuo pinaagi sa pagsunod sa ebanghelyo.*

### OUTLINE SA PANAHON SA PAGPAKIGBAHIN

Ang binulan nga mga tema niini nga *outline* adunay kauban nga mga kasulatan nga mahimong sag-uhon sa mga bata. Ang sinemana nga mga baruganan sa ebanghelyo kinahanglang itudlo atol sa mga panahon sa pagpakigbahin ug sa pangbukas o panapos nga mga tulumanon nianang bulana. Sa kasagaran, usa ra ka baruganan sa ebanghelyo ang itudlo kada semana. Ang ubang sinemana nga mga baruganan sa ebanghelyo gisundan og gisugyot nga ideya sa panahon sa pagpakigbahin. Ang tanan adunay pakisayran sa laing mga tinubdan nga makatabang kanimo sa pagplano sa panahon sa pagpakigbahin. Usahay tingali adunay panginahanglan ang inyong Primary, sama sa pagpahinungod sa templo o pokus sa lider sa priesthood, nga magkinahanglan og espesyal nga pagpasabut sa panahon sa pagpakigbahin.

### TEMA SA ENERO

**Ako adunay hugot nga pagtuo ni Ginoong Jesukristo.** *“Kon kamo adunay hugot nga pagtuo kamo molaum sa mga butang nga dili makita, diin nga tinuod”  
(Alma 32:21).*

♪ *Mosunod Ako Kaniya sa Hugot nga Pagtuo”  
(pahina 11).*

#### *Sinemana nga Mga Baruganan sa Ebanghelyo*

1. Ako adunay hugot nga pagtuo ni Ginoong Jesukristo. Ang hugot nga pagtuo nagpasabut og pagsalig. Ako mosalig Kaniya, ug mosunod ako Kaniya (“Hugot nga pagtuo,” Alma 32; Ether 12:12–18; *BE*, kapitulo 18).

Basaha ang Alma 32:21, 28–30 uban sa mga bata ug itudlo ang baruganan sa hugot nga pagtuo. Ipasabut nga ang hugot nga pagtuo nagpasabut og pagsalig ni Ginoong Jesukristo. Pasugyuta ang mga bata og mga paagi sa pagtabang nga motubo ang usa ka liso. Ipasabut nga sama sa atong pag-atiman sa usa ka liso, kinahanglan usab atong atimanon ang atong pagtuo sa pagtabang niini nga motubo. Ipabasa sa mga bata ang mosunod nga mga kasulatan aron makat-unan unsay ilang

buhaton sa pagtabang sa ilang hugot nga pagtuo ni Jesukristo nga motubo: Juan 5:39; Juan 7:16–17; Santiago 1:5; Moroni 10:4–5; ug D&P 21:4–5. Hisguti kini nga mga kasulatan. Basaha ang Alma 32:27. Ipamatuod kon sa unsa nga paagi mitubo ang imong hugot nga pagtuo. Patamna ang mga bata og usa ka liso diha sa papel nga baso nga dad-on ngadto sa ila. Kantaha ang “Ako Nasayud Akong Amahan Buih” (*Mga Himno ug mga Awit sa mga Bata*, 59).

2. Hugot nga pagtuo ni Ginoong Jesukristo mao ang unang baruganan sa ebanghelyo (*Mga Artikulo sa Hugot nga Pagtuo* 1:4; Mateo 8:5–13; Marcos 10:46–52; Jeffrey R. Holland, “Pabilin Kamo Kanako,” *Liahona*, Mayo 2004, 30–32).
3. Ang akong hugot nga pagtuo ni Jesukristo maligon kon ako mag-ampo (1 Nephi 7:16–18; 18:8–23; Enos 1:12–15; Mosaih 24:7–25; Alma 33:1–14).
4. Ako adunay hugot nga pagtuo ni Ginoong Jesukristo. Siya motabang kanako sa pagsunod sa mga sugo (1 Nephi 3:7).

Ipadrama sa mga bata ang istorya ni Nephi ug sa iyang pamilya nga nagbuhat og barko ug milawig ngadto sa gisaad nga yuta (1 Nephi 17–18). Isaysay ang istorya samtang ang mga bata mo-*pantomine* sa istorya. Basaha ang 1 Nephi 3:7 ug kantaha ang “Pangahas Pagbuhat sa Matarung” (*Mga Himno ug mga Awit sa mga Bata*, 64). Hisguti ang usa ka higa-yon sa diha nga ang Ginoo mihatag kanimo og paagi sa pagsunod sa Iyang mga sugo. Pakigbahin og ubang mga ehemplo sa hugot nga pagtuo ug pagkamasulundon gikan sa mga kasulatan, sama sa 1 Samuel 17; Daniel 3; o 1 Nephi 3–4.

### TEMA SA PEBRERO

**Ang akong hugot nga pagtuo ni Jesukristo motubo kon ako makaila kinsa Siya.** *“Ug kami nagatuo ug among nasinati, nga ikaw mao ang Balaan nga Dios”  
(Juan 6:69).*

♪ *“Samtang Nagbasa Anang Sugilanong Matahum”  
(Mga Himno ug mga Awit sa mga Bata, 60)*

### ***Sinemana nga Mga Baruganan sa Ebanghelyo***

1. Si Jesukristo mao ang unang natawo nga Anak sa Langitnong Amahan. Anak usab ako sa Dios (D&P 93:21; Abraham 3:22–24; Mga Buhat 17:29; *BE*, mga kapitulo 1–2).
2. Ang Langitnong Amahan adunay plano alang kanako. Si Jesukristo ug ang Iyang Pag-ula mahinungdanon niini nga plano (Moises 6:62).

Ipasabut nga ang plano sa Langitnong Amahan mao ang panaw nga nagsugod sa langit. Kantaha ang “Ako Anak sa Dios” (*Mga Himno ug mga Awit sa mga Bata*, 58). Pagpahimutang og mga dapit nga magrepresentar sa kinabuhi sa wala pa sa yuta, kinabuhi sa yuta, ug kinabuhi human sa kamatayon. Pabiyahi-a ang mga bata agi ngadto sa mga dapit, ang matag usa magdala og bag.

Dapit 1: Tudloi ang mga bata mahitungod sa kinabuhi sa wala pa sa yuta. Isulod sa ilang mga bag ang mga pulong o mga butang nga nagrepresentar sa ilang espiritu nga mga lawas, kabubut-on, ang Paglalang, ug sa Manluluwas.

Dapit 2: Tudloi mahitungod sa mga katuyoan sa kinabuhi sa yuta. Ihatag sa mga bata ang mga pulong o mga butang nga nagrepresentar sa ilang pisikal nga mga lawas, mga pamilya, sa ebanghelyo, mga ordinansa, pagkamasulundon, ug sala. Hisguti ang kamahinungdanon sa paghinulsol ug pabayloi sa mga bata ang ilang mga “sala” sa nagrepresentar sa Pag-ula. Ipasabut nga ang atong mga espiritu ug mga lawas magbulag sa kamatayon, ug kuhaa ang ilang “pisikal nga mga lawas” gikan sa mga bag.

Dapit 3: Tudloi mahitungod sa kalibutan sa espiritu, magpasabut nga kini usa ka dapit diin ang atong mga espiritu maghulat sa pagkabanhaw. Ipasabut nga kitang tanan mabanhaw (idugang ang “pisikal nga mga lawas” ngadto sa ilang mga bag pag-usab) ug pagahukman tungod sa atong mga pagpili dinhi sa yuta. Tudloi sila nga ang Pag-ula makahimo nga posible alang kanato nga makapuyo pag-usab uban sa Langitnong Amahan.

3. Si Jesukristo milalang sa yuta isip usa ka dapit alang kanato nga kapuy-an ug makaangkon og kasinatian (3 Nephi 9:15; “Ang Paglalang,” *BE*, kapitulo 5).

Isulat ang *Unsa ang gilalang sa Dios alang kanako* ubos sa litrato ni Jesukristo, ug basaha ang 3 Nephi 9:15.

Ipakita ug hisguti ang mga litrato sa mga gilalang sa Dios. Isulat ang *Unsa ang akong kinahanglang buhaton dinhi sa yuta*, ug basaha ang Alma 34:32. Gamita ang “Ang Akong mga Sumbanan sa Ebanghelyo” sa pagtudlo sa mga butang nga kinahanglan nga atong buhaton samtang ania sa yuta aron makabalik sa pagpuyo uban sa Langitnong Amahan ug ni Jesukristo. Pabutangi og kolor sa mga bata ang ginunting nga usa ka bata nga mapareha sa ilang kaugalingon ug pasulati sa luyo og usa ka baruganan gikan sa “Ang Akong mga Sumbanan sa Ebanghelyo” nga ilang ipasalig nga sundon. Ipahimutang ang mga ginunting ubos sa *Unsa ang akong kinahanglan nga buhaton sa yuta*. Kantaha ang “Ang Ginoo Naghatag Kanato og Templo” *Mga Himno ug mga Awit sa mga Bata*, 62).

4. Si Jesukristo nagpuyo dinhi sa yuta. Ang iyang mga pagtulun-an ug mga milagro nakapanalangin sa mga kinabuhi sa mga tawo (Mateo 5–7; 9:18–35; 14:15–33; Sydney S. Reynolds, “Dios sa mga Milagro,” *Liahona*, Hulyo 2001).

### **TEMA SA MARSO**

**Ang akong hugot nga pagtuo ni Jesukristo motubo kon ako mosunod sa iyang ehemplo ug mohupot sa iyang mga sugo.** “*Sunod kanako, ug buhata ang mga butang nga inyong nakita nga akong gibuhat*” (2 Nephi 31:12).

♪ “Pangahas Pagbuhat sa Matarung” (*Mga Himno ug mga Awit sa mga Bata*, 64)

### ***Sinemana nga Mga Baruganan sa Ebanghelyo***

1. Ang kinabuhi ni Jesukristo usa ka ehemplo ngari kanako (Juan 13:15; 3 Nephi 18:24; “Pangahas Pagbuhat sa Matarung” [*Mga Himno ug mga Awit sa mga Bata*, 64]).
2. Ako magtuon sa mga kasulatan ug mag-ampo (Juan 5:39; Mateo 14:23; Alma 37:37; “Gahum sa Kasulatan” [*Outline alang sa Panahon sa Pagpakigbahin*, 2006, 10–11]).
3. Ako mobalaan sa Igpapahulay nga Adlaw (Exodo 20:8; D&P 59:9–14).

Isulat sa mga papel ang tukma nga mga kalihokan alang sa Dominggo. *Mosimba*, *Moambit sa sakramento*, *Mobasa sa mga kasulatan*, *Mobisita og pamilya*, *Mosulat sa akong journal*, ug uban pa. Papuli-puliha ang mga bata sa pagpili og papel ug ipabuhat ang kalihokan samtang ang ubang mga bata sa Primary motag-an unsa ang kalihokan. Ipasabut

nga kita kinahanglang mag-andam alang sa Igpapahulay. Tabangi ang mga bata nga mosagulo sa parapo 6 gikan sa “Akong mga Sumbanan sa Ebanghelyo”: Akong buhaton ang mga butang sa Igpapahulay nga makatabang kanako nga mobati og kasuod sa Langitnong Amahan ug ni Jesukristo”

4. Akong sundon ang mga sugo ug magpuyo karon nga takus nga moadto sa templo (Primary 1, leksyon 26, “Ang Akong mga Sumbanan sa Ebanghelyo”).

Kantaha ang unang bersikulo sa “Ang Ginoo Naghatag Kanako og Templo” (*Mga Himno ug mga Awit sa mga Bata*, 62).” Ipakita ang mga litrato sa templo PHE 502 ug 504. Sa kinatibuk-ang pagkaka-sulti, itudlo ang mahitungod sa mga ordinansa ug mga panalangin sa templo, sama sa celestial nga kaminyoon ug bunyag alang sa mga patay. Paghimo og dako nga tanghaga [*puzzle*] sa usa ka templo, ug sagol-sagola ang mga piraso. Sa luyo sa matag piraso, isulat ang usa ka butang nga kinahanglan natong buhaton aron mahimong takus nga moadto sa templo (tan-awa sa “Akong mga Sumbanan sa Ebanghelyo”). Papilia ang mga bata og piraso sa tanghaga [*puzzle*], ipabasa ang luyo, ug ipahimutang ang piraso sa tanghaga. Ipaambit ang imong pagpamatuod mahitungod sa kaimportante sa pagpangandam alang sa templo. Kantaha ang ikaduhang bersikulo sa “Ang Ginoo Naghatag Kanako og Templo.”

## TEMA SA ABRIL

**Ang akong hugot nga pagtuo ni Jesukristo motubo kon ako makaila nga Siya mao ang akong Manluluwas ug Manunubos.** “*Kay gihigugma gayud sa Dios ang kalibutan nga tungod niana gihatag niya ang iyang bugtong Anak, aron ang tanan nga mosalig kaniya dili malaglag kon dili may kinabuhing dayon*” (Juan 3:16).

♪ “Ako Nasayud Akong Manunubos Buhi” (*BE* p. 348)

### **Sinemana nga Mga Baruganan sa Ebanghelyo**

1. Si Jesukristo mao ang akong Manluluwas ug Manunubos. Mianhi Siya sa kalibutan aron sa pag-buhat sa kabubut-on sa Amahan (2 Nephi 25:26; Lucas 2:49 [41–49]; Juan 5:30 [17–30]; 3 Nephi 11:10–11; “Ang Pasig-uli,” *BE*, kapitulo 12; “Ako Nasayud akong Amahan Buhi” [*BE*, 348]).

2. Tungod sa Pag-ula ug Pagkabanhaw ni Jesukristo, ako mabanhaw (Juan 20:14–29; 1 Mga Taga-Corinto 15:20–22).

Tudloi ang mga bata nga si Jesukristo namatay alang kanato ug nabanhaw. Ipasabut nga kita mabuhi pag-usab human kita mamatay, usab. Palihoka ang mga bata, magpakita sa ilang paborito nga mga aksyon (pagsayaw, pagpatid sa bola, ug uban pa), sa pagpakita nga ang espiritu makapalihok sa lawas kon kita buhi. Itandi ang pisikal nga lawas sa usa ka *jacket*, nga dili makalihok tungod kay kini walay “espiritu” sa sulod. Ipasul-ob sa usa ka bata ang *jacket* ug palihoka, ug itandi kini ngadto sa espiritu nga nakapahimo sa lawas nga buhi. Ipasabut nga kon kita mamatay, atong biyaan ang atong mga lawas (huboa ang *jacket*), apan ang atong mga espiritu mahangturon ug dili mamatay. Tabangi ang mga bata nga makasabut nga ang pagkabanhaw mao ang pagkahiusa pag-usab sa lawas ug sa espiritu. Kantaha ang “Siya Namatay Aron Kita Mabuhi Pag-usab” (*Liahona*, April 2005). Pagpamatuod kabahin sa Pag-ula ug pagkabanhaw.

3. Tungod sa Pag-ula, ako makahinulsol ug makabalik sa pagpuyo uban sa Langitnong Amahan ug ni Jesukristo (1 Juan 2:25; D&P 19:16; “Paghinulsol,” *Liahona*, Okt 2004; *BE*, kapitulo 19).

4. Ang akong hugot nga pagtuo ni Jesukristo motubo sa dihang ako nakadungog sa mga apostoles ug mga propeta nga nagpamatuod mahitungod kaniya (D&P 1:38, 76:22–23; *BE*, kapitulo 9).

Sa mga estasyon palibut sa kwarto, ipahimutang ang mga litrato nga nagrepresentar sa mga hilisgutan sa upat ka mga pakigpulong nga gihatag sa mga miyembro sa Korum sa Napulog Duha ka mga Apostoles o sa Unang Kapangulohan sa bag-o nga kinatibuk-ang komperensya (gamita ang mga mensahe nga anaa sa *Ensign*. Bahina ang mga bata ngadto sa upat ka mga grupo ug hatagi ang matag bata og blangko nga papel ug lapis o krayola. Sa matag estasyon, hisguti ang pakigpulong nga girepresentar sa litrato, ug kuhaa ang pagtagad sa mga bata ngadto sa pagpamatuod sa mamumulong. Pangutana sama sa, “Unsay inyong gibati sa dihang inyong nadunggan ang pagpamatuod niini nga mamumulong?” ug “Unsa ang inyong buhaton sa pagsunod niini nga tambag gikan sa Ginoo?” Ipasulat sa mga bata o ipadrowing kon unsay ilang buhaton.

## TEMA SA MAYO

### Ang akong pagtuo ni Jesukristo motubo sa dihang akong nakat-unan ang mahitungod sa Pagpahiuli sa ebanghelyo.

*“Busa, ania karon, ako magpadayon pagbuhat og usa ka katingalahan nga buhat sa taliwala niining katawhan, bisan usa ka katingalahan nga buhat ug usa ka kahibulongan nga buhat” (Isaias 29:14).*

♪ “Ang Bulawang mga Palid” (*Mga Himno ug mga Awit sa mga Bata*, 65).

### Sinemana nga Mga Baruganan sa Ebanghelyo

1. Ang Ginoo mipahiuli sa kahingpitan sa ebanghelyo pinaagi ni Joseph Smith (Mga Buhat 3:20–21; 2 Nephi 3:6–15; Joseph Smith—Kasaysayan 1:18–19, 26, 30, 33–34).

2. Si Joseph Smith mihubad sa Basahon ni Mormon pinaagi sa gahum sa Dios (Joseph Smith—Kasaysayan 1:27–54, 59–67; *Primary* 5, mga leksyon 5–7).

Ipakita ang PHE 325 ug isaysay ang istorya sa paghubad sa Basahon ni Mormon gikan sa bulawan nga mga palid. Bahina ang mga bata ngadto sa mga grupo, ug hatagi ang matag grupo og usa ka parte sa istorya nga ihulagway (padrowinga ang mga bata og litrato). Ipapilit ang mga litrato sa saktong pagkahan-ay, ug ipakita kini sa usa ka *roller box* samtang ang mga bata mosaysay pag-usab sa istorya sa ilang kaugalingong mga pulong. Kantaha ang “Ang Bulawang mga Palid” (*Mga Himno ug mga Awit sa mga Bata*, 65)

3. Ang Basahon ni Mormon mao ang pulong sa Dios ug laing testamento ni Jesukristo (D&P 19:26–27; Mga Artikulo sa Hugot nga Pagtuo 1:8; ulohan nga pahina sa Basahon ni Mormon).

Ipabasa sa usa ka bata ang ulohan sa pahina sa Basahon ni Mormon. Pangutan-a ngano nga ang Basahon ni Mormon gitawag og “Lain nga Tugon ni Jesukristo.” Pangutana, “Unsa ang tugon?” Usa ka saksi. Ipasabut nga dul-an sa katunga sa mga bersikulo sa Basahon ni Mormon naghigot sa Ginoo, nga si *Jesukristo*, o sa ubang mga pangalan sa Manluluwas. Pagtudlo og grupo sa mga bata nga mosiksik sa laing mga basahon sa Basahon ni Mormon sa pagpangita sa mga bersikulo nga naghigot o nagtudlo mahitungod ni Jesukristo. Dapita ang matag grupo sa pagbasa sa usa sa ilang mga kasulatan pagkusog samtang imong ilita kini sa

pisara. Ipapangita sa mga bata ug ipabasa ang 2 Nephi 25:23 ug Mormon 3:20–22. Tabangi ang mga bata nga makasabut kon sa unsa nga paagi kini nga mga bersikulo nagsaksi ni Kristo. Kantaha ang ikaduha ug ikatulo nga mga bersikulo sa “Unang Pag-ampo ni Joseph Smith” (*BE*, 328). Ipahayag ang imong pagpamatuod sa Basahon ni Mormon.

4. Ang priesthood gipahiuli. Usa ka buhi nga propeta naghupot sa tanang mga yawe ug awtoridad sa priesthood ug naggiya sa Simbahan ubos sa direksyon ni Jesukristo (Joseph Smith—Kasaysayan 1:68–72; D&P 27:12; *BE*, mga kapitulo 13–14).

## TEMA SA HUNYO

### Akong gisunod si Jesukristo sa hugot nga pagtuo kon ako mohimo ug motuman sa akong pakigsaad sa bunyag.

*“Magaingon ako kaninyo, gawas kon ang tawo igaanak sa tubig ug sa Espiritu, dii siya makasulod sa gingharian sa Dios” (Juan 3:5).*

♪ Kantaha ang “Tudloi ‘Ko sa Paglakaw sa Kahayag” (*Mga Himno ug mga Awit sa mga Bata*, 66)

### Sinemana nga Mga Baruganan sa Ebanghelyo

1. Si Jesukristo gibunyagan (Mateo 3:13–17; 2 Nephi 31:4–9; D&P 20:37; Mga Artikulo sa Hugot nga Pagtuo 1:4; *BE*, kapitulo 18–20; PHE 208).

2. Kon ako bunyagan, ako makigsaad sa Langitnong Amahan nga ako modala diha sa akong kaugalingon sa pangalan ni Jesukristo, maghinumdom Kaniya kanunay, ug magsunod sa Iyang mga sugo (D&P 20:77).

Ipakita ang Litrato 1-1 o 3-13 (“Bunyag sa usa ka bata”). Ipasabut ngadto sa mga bata nga kon kita bunyagan, ang Espiritu Santo mohimo kanato nga limpyo gikan sa sala. Bahina ang mga bata ngadto sa duha ka grupo ug papulipuliha sila sa paghingalan sa mga butang nga kinahanglan natong buhaton sa pagsunod sa mga sugo sa Ginoo (isulti ang kamatuoran, maghigugmaay sa usag usa, ug uban pa). Isulat kining mga butanga sa pisara. Basaha ang Mosiah 18:8–11, tabangi ang mga bata sa pag-ila sa piho nga mga butang nga andam buhaton sa mga katawhan ni Alma sa dihang sila gibunyagan, ug ipasabut nga kinahanglan buhaton nato kining sama nga mga butanga aron sa pagpakita nga kita nahinumdom ni Jesus. Ipamatuod ang mga panalangingin nga atong madawat kon kita motuman sa atong pakigsaad sa bunyag. Kantaha ang “Tudloi

‘Ko Paglakaw sa Kahayag’ (*Mga Himno ug mga Awit sa mga Bata*, 66).

3. Human ako mabunyagi, ako kumpirmahan nga usa ka miyembro sa Ang Simbahan ni Jesukristo sa mga Santos sa Ulahing mga Adlaw ug nakadawat sa gasa sa Espiritu Santo (3 Nephi 18:36–37; 4 Nephi 1:1).

Ipakita ang PHE 601; dayon ang PHE 602. Ipasabut nga human kita mabunyagi kita kumpirmahan nga mga sakop sa Ang Simbahan ni Jesukristo sa mga Santos sa Ulahing mga Adlaw, ug hatagan sa sa Espiritu Santo. Kantaha ang “Pangahas Pagbuhat sa Matarung” (*Mga Himno ug mga Awit sa mga Bata*, 64). Hangyoga ang mga bata nga mopakigbahin og mga istorya gikan sa mga kasulatan, sa ilang kaulangong kasinatian, sa ilang mga kasaysayan sa pamilya, o mga ideya gikan sa kanta aron sa pag-ila sa ubang mga panalangin sa pagkamiyembro sa Simbahan.

4. Ako moambit sa sakramento aron sa pagbag-o sa akong pakigsaad sa bunyag ngadto sa Langitnong Amahan (3 Nephi 18:7, 10–11; D&P 20:77, 79; “Ang Sakramento,” *BE*, kapitulo 23).

## TEMA SA HULYO

### Ang akong pamilya makasunod ni Jesukristo

**pinaagi sa hugot nga pagtuo.** “*Ang kalipay diha sa kinabuhi sa banay labaw nga makab-ot kon gipasikad diha sa mga pagtulun-an sa Ginoong Jesukristo.*” (Pamahayag, paragraf 7).

♪ “Gugma sa Panimalay” (*Mga Himno ug mga Awit sa mga Bata*, 44)

### Sinemana nga Mga Baruganan sa Ebanghelyo

1. Makakat-on ako mahitungod sa matarung nga mga pamilya pinaagi sa pagbasa sa mga kasulatan (Moises 5:1–2, 5, 10–12, 58; 6:1; Lucas 2:1–16; Mateo 9:18–19, 23–25; Marcos:22–24, 35–43; Lucas 8:41–42, 49–56; 1 Nephi 2:1–7; Mosiah 27; Alma 53:10–21; 56:44–56; 58:39).

Bahina ang mga bata ngadto sa mga klase o mga grupo, ug hatagi ang matag grupo og usa sa mosunod nga mga litrato: PHE 119, PHE 200, PHE 215, PHE 301, PHE 321, PHE 313. Ipapangita, ipabasa, ug ipahisgot sa matag grupo ang istorya sa kasulatan nga gihulagway sa litrato (ang mga pakisayran sa kasulatan nga gilista sa likod diha

sa ilang litrato makatabang). Dayon papulipuliha ang mga grupo sa pagpakigbahin unsa ang ilang nakat-unan gikan sa mga kasulatan mahitungod niining matarung nga mga pamilya. Kantaha ang “Pagkamabination Magsugod Kanako” (*Mga Himno ug mga Awit sa mga Bata*, 67).

2. Ang unang miyembro sa akong pamilya nga nagpasakop sa Simbahan misunod ni Jesukristo pinaagi sa hugot nga pagtuo. Makakat-on ako mahitungod sa akong family history (D&P 136:2, 4, 11; “Pag-ampo alang sa Banay” [*Mga Himno ug mga Awit sa mga Bata*, 67].)
3. Akong tauron ang akong amahan ug inahan ug mopakita og pagtahud sa uban sa akong pamilya (Exodo 20:12).

Bahina ang mga bata ngadto sa mga grupo nga tinagurha o tinagutlo. Hatagi ang matag grupo og lain-laing hitabong tun-anan [*case study*] mahitungod sa usa ka sitwasyon sa pamilya nga nagdapit og pagtahud ug pagsunod sa mga ginikanan o pagpakita og pagtahud sa uban. Pahimoga ang mga bata og papel nga sako, tukog, o mga *finger puppet* ug magpulipuli sa pagdrama sa hitabong tun-anan [*case study*], magpakita unsay ilang buhaton sa sitwasyon nga magpakita og pasidungog ug pagtahud. Kantaha ang “Gugma sa Panimalay” (*Mga Himno ug mga Awit sa mga Bata*, 44).

4. Ang akong pamilya makasunod ni Jesukristo pinaagi sa hugot nga pagtuo pinaagi sa paghimo og pamilya nga pag-ampo, pagtuon sa kasulatan sa pamilya, ug family home evening (“Pag-ampo sa Banay,” [*Mga Himno ug mga Awit sa mga Bata*, 67]).

## TEMA SA AGOSTO

**Ang akong pagtuo ni Jesukristo motubo kon ako maminaw sa Espiritu Santo.** “*Kay, tan-awa, ang Maghuhupay nasayud sa tanan nga mga butang, ug nagpamatuod sa Amahan ug sa Anak*” (D&P 42:17).

♪ “Ako Nasayud nga ang Akong Amahan Buhi” (*BE*, 367)

### Sinemana nga Mga Baruganan sa Ebanghelyo

1. Ang usa ka pagpamatuod usa ka espirithunanon nga saksi nga gihatag sa Espiritu Santo (3 Nephi 28:11; Moroni 10:4–5; *Primary* 5, Leksyon 46).

Basaha ang Moroni 10:4–5 ug ipasabut nga ang Espiritu Santo motabang kanato nga makahibalo

unsa ang tinuod. Tudloi ang mga bata nga ang atong lima ka mga tudlo makapahinundom kanato sa mga butang nga gisaksi sa Espiritu Santo: (1) Ang Dios mao ang atong Amahan sa Langit; (2) Si Jesukristo mao ang Iyang Anak ug ang atong Manluluwas; (3) Si Joseph Smith mao ang propeta sa Dios, ug ang Basahon ni Mormon, nga iyang gihubad pinaagi sa gasa ug gahum sa Dios tinuod; (4) Ang Simbahan ni Jesukristo sa mga Santos sa Ulahing mga Adlaw mao ang simbahan sa Ginoo; ug (5) Kita adunay buhi nga propeta sa yuta karon. Hisguti kon sa unsa nga paagi kining lima ka mga pamahayag mihulma sa pundasyon sa usa ka pagpamatuod. Ipasubay og drowing sa mga bata ang usa sa ilang mga kamot sa usa ka papel ug isulat o ipadrowing ang lima ka mga butang diha sa mga tudlo. Kantaha ang unang bersikulo sa “Ako Nasayud nga ang Akong Amahan Buhi” (*Mga Himno ug mga Awit sa mga Bata*, 59). Tabangi ang mga bata sa pagsag-ulo sa Moroni 10:5. Ipahayag ang imong pagpamatuod mahitungod sa Espiritu Santo.

2. Akong gidapit ang mga pag-aghat sa Espiritu Santo kon ako mag-ampo, magbasa sa mga kasulatan, magsunod sa mga sugo, ug magsunod sa buhi nga mga propeta (Alma 5:45–46; D&P 6:14–15; 138:1, 6, 11).
3. Akong mailhan ang mga pag-aghat sa Espiritu Santo (Mga Taga-Roma 15:13).

Ipakita ang ka-importante sa pagpaminaw pinaagi sa paghunghong og usa ka butang ngadto sa usa sa mga bata, kana nga bata mohunghong niini ngadto sa lain, ug sa sunod hangtud sa mga walo o napulo ka tawo nakahunghong sa mensahe. Ipasulti sa una ug katapusang tawo unsa ang ilang nadunggan, ug ipasulti ngano nga ang mensahe nahimong nausab. Dayon pangutan-a ang mga bata kon unsaon nato sa pag-ila ang mga pag-aghat sa Espiritu Santo. Ipasabut nga ang mga kasulatan nagtudlo kanato unsaon sa pag-ila sa Iyang mga pag-aghat. Bahina ang mga bata ngadto sa mga grupo, hatagi ang matag grupo og usa sa mosunod nga mga kasulatan nga hisgutan, ug dayon dapita ang matag grupo sa pagpakigbahin unsa ang gitudlo sa ilang mga kasulatan mahitungod sa mga pag-aghat sa Espiritu Santo: Moroni 8:25–26; Mga Taga-Galacia 5:22–23; D&P 36:2; Juan 14:26; D&P 8:2; ug D&P 9:7–9. Ipahayag ang

imong pagpamatuod mahitungod sa Espiritu Santo. Kantaha ang “Ako Nasayud Akong Amahan Buhi” (*Mga Himno ug mga Awit sa mga Bata*, 59).

4. Ang Espiritu Santo nagpamatuod ni Jesukristo ug makatudlo, makagiya, makapasidaan, makapanalipod, ug makahupay kanako (Juan 14:26; 15:26; 2 Nephi 31:17; Moroni 10:5; D&P 6:14–15; 8:2; 11:12; 20:27; “Ang Malinawon nga Gamay nga Tingog,” [*Liahona*, Abril 2006]).

## TEMA SA SEPTYEMBRE

**Ang akong pagtuo ni Jesukristo motubo kon ako moserbisyo sa uban.** “Kon kamo anaa sa pag-alagad sa inyong isig ka tawo kamo anaa lamang sa pag-alagad sa inyong Dios” (Mosiah 2:17).

### Sinimana nga Mga Baruganan sa Ebanghelyo

1. Si Jesukristo mitudlo kanato sa pagserbisyo sa uban (“Ang Pag-alagad,” *BE*, kapitulo 28).

Ipakigbahin ang mga ehemplo gikan sa mga kasulatan sa pagserbisyo ni Kristo sa uban, ug tabangi ang mga bata nga mopahisama niini sa atong mga kahigayunan sa pagserbisyo (Lucas 8:1—nagsangyaw og maayong mga balita; Mateo 18:11–14—pagpangita sa nawala nga karnero; 3 Nephi 17:1–9—pagpangalagad sa tagsa-tagsa). Ipakita ang dako nga orasan nga adunay malihok nga mga kamot, ug samtang inyong lihokon ang mga kamot ngadto sa lainlaing mga oras sa adlaw, pangutan-a ang mga bata unsay ilang mabuhar nianang orasa sa adlaw aron pagserbisyo sa uban. Kantaha ang “Samtang Nagbasa Anang Sugilanong Matahum” (*Mga Himno ug mga Awit sa mga Bata*, 60)

2. Ako moserbisyo sa akong pamilya (1 Nephi 16:17–32).

Ribyuha ang istorya sa nabali nga pana ni Nephi (1 Nephi 16:17–32). Hangyoga ang mga bata sa paghunahuna og mga paagi nga sila makaserbisyo sa uban diha sa ilang kaugalingong mga pamilya, sama sa gibuhar ni Nephi. Patindoga ang mga bata nga mag-alirong. Paguniti sa usa ka bata ang tumoy sa hilo sa bola, pasultiha og usa ka paagi sa pagserbisyo sa usa ka sakop sa pamilya, ug ipa-itsa ang bola ngadto sa laing bata. Padayona ang mga bata nga maggunit sa hilo, ipasulti ang mga paagi nga sila makaserbisyo sa ilang mga pamilya, ug ipa-itsa ang hilo hangtud ang tanang mga bata nakagunit sa hilo ug kini nahimo nga dako nga

lawa-lawa. Ipasabut nga ang pagserbisyo sa uban naghabol og lawa-lawa sa maayong buhat ug gugma nga makapatandog sa tanan. Kantaha ang “Pagkamabination Magsugod Kanako” (*Mga Himno ug mga Awit sa mga Bata*, 63).

3. Ako moserbisyo sa uban pinaagi sa mabinationong pagtagad kanila ug makigbahin unsay ania kanako (Lucas 10:30–36; Juan 13:34–35; Mga Taga-Galacia 5:13–14; “Pagkamabination Magsugod Kanako” [*Mga Himno ug mga Awit sa mga Bata*, 63]).
4. Samtang nagserbisyo ako sa uban, ako nagserbisyo ni Jesukristo ug nagpakita sa akong gugma alang Kaniya (Mateo 25:34–40; Juan 21:15–17; Mosiah 2;17–18; “Pangahas Pagbuhat sa Matarung” [*BE*, 374]).

### TEMA SA OKTUBRE

**Ako nagpakita sa akong hugot nga pagtuo ni Jesukristo kon ako mopakigbahin sa ebanghelyo ngadto sa uban.** “*Pasigaa ninyo ang inyong kahayag sa atubangan sa mga tawo aron makita nila ang inyong mga maayong buhat ug dayegon nila ang inyong Amahan nga anaa sa langit*” (Mateo 5:16).

#### *Sinimana nga Mga Baruganan sa Ebanghelyo*

1. Magpakita ako og maayong ehemplo ngadto sa uban pinaagi sa akong pagpuyo (1 Timoteo 4:12; Alma 17:11; 53:20–21; “Ang Ginoo Naghatag Kanako og Templo” [*BE*, 372]).
2. Ang akong pagpamatuod motubo kon ako mopakigbahin niini sa akong mga higala ug maminaw sa mga pagpamatuod sa uban (Mosiah 18:6–9; Alma 22:13–18; “Ako Anak sa Dios” [*BE*, 368]).
3. Akong dapiton ang akong mga higala ngadto sa Primary (D&P 4).

Ipakita ang pamahayag “Magtinguha ako og maayong mga higala ug motagad sa uban sa mabinationong paagi” gikan sa “Akong Mga Sumbanan sa Ebanghelyo.” Kantaha ang “Pagkamabination Magsugod Kanako” (*Mga Himno ug mga Awit sa mga Bata*, 163). Hisguti ang mahitungod sa pagdapit sa mga higala ngadto sa Primary ug ngadto sa mga kalihokan sa Primary. Hisguti kon unsaon pagtagad ang mga higala sa mabinationong paagi. Pagbutang og dugang nga lingkuranan, ug ipadrama kon unsay isulti ngadto sa usa ka bag-o nga higala diha sa Primary. Ipabansay sa mga bata ang mga paagi sa pagtabang sa uban nga mobati nga

makomportable diha sa Primary. Awhaga ang mga bata sa pagdapit og mga higala ngadto sa Primary.

4. Mag-andam ako karon nga mahimong usa ka misyonaryo (1 Timoteo 4:12; David A. Bednar, “Pagkahimong usa ka Misyonaryo,” *Liahona*, Nob. 2005, 44–47; “Mga Kinahanglanon” alang sa “Ganti sa Hugot nga Pagtuo diha sa Dios,” mga sumbanan nga basahon sa *Hugot nga Pagtuo sa Dios*, 4–5).  
Pagsulat og pinili nga mga baruganan gikan sa “Akong mga Sumbanan sa Ebanghelyo” sa laing mga piraso sa papel. Grupoha ang mga bata ug papilia ang matag grupo og usa ka papel. Pahimoo ang matag grupo og paghisgot [*buzz session*] kala-but sa unsa nga paagi nga ang pagpuyo niana nga sumbanan makatabang kanila nga maandam nga mahimong usa ka misyoanryo. Dapita ang matag grupo sa pagpakigbahin unsa ang ilang nakat-unan. Ipamatuod nga pinaagi sa pagpuyo karon sa takus nga paagi, nagtabang kita sa pagtukod sa gingharian sa Dios. Kantaha ang “Ako Moadto Diin Ikaw Buot nga Ako Moadto” [*BE*, 356]).

### TEMA SA NOBYEMBRE

**Ang akong hugot nga pagtuo ni Jesukristo makapanalagin sa akong kinabuhi. Mapasalamaton ako sa akong mga panalangin.** “*Kamo mopasalamat sa Ginoo nga inyong Dios sa tanan nga mga butang*” (D&P 59:7).

#### *Sinimana nga Mga Baruganan sa Ebanghelyo*

1. Mapasalamaton ako sa akong panimalay ug sa pamilya (Genesis 37, 41–45; “Ako Nagpasalamat Kanimo, Mahal nga Amahan” [*BE*, 369]).
2. Mapasalamaton ako sa akong pagka-miyembro sa Simbahan ni Jesukristo (Mosiah 18:7–17; 3 Nephi 26:17–21; D&P 115:3–6; *BE*, kapitulo 17).
3. Mapasalamaton ako sa priesthood, ug ako napanalanginan niini (*BE*, kapitulo 13).

Tudloi ang mga bata nga ang priesthood mao ang awtoridad nga gihatag sa Dios ngadto sa takus nga mga miyembro nga lalaki sa Simbahan aron makapahimo kanila sa pagtabang sa Iyang buhat sa pagpahinabo sa “pagka-imortal ug kinabuhing dayon sa tawo” (Moises 1:39). Tudloi mahitungod sa unsa nga paagi nga ang lalaki ug babaye mapanalanginan pinaagi sa gahum sa priesthood. Sa pikas nga bahin sa pisara, ipahimutang ang mga litrato nga nagpakita sa pipila ka mga katungdanan sa priesthood, sama sa PHE 601, 602, 603, 604, 611, 612, 613, ug 614.

Sa pikas nga bahin sa pisara, sa bisan unsa nga pagkahan-ay, isulat ang mga pulong nga naghingalan sa mga katungdanan, sama sa *pagbunyag* o *pagpanalangingin sa masakiton*. Pagtawag og mga bata nga mopili og usa ka litrato nga may kalabutan sa ilang kaugalingong kasinatian, mohisgot kalabut sa ilang kasinatian, ug molinya gikan sa litrato ngadto sa mitukma nga pulong. Paghangyo og mas gulang nga bata sa pag-ila sa katungdanan sa priesthood nga gikinahanglan sa pagpahigayon niana nga katungdanan. Kantaha ang “Ipha ang Inyong Panalangin” (*Mga Himno ug mga Awit sa mga Bata*, 8).

4. Akong ipakita ang akong pasalamat ug gugma alang sa Langitnong Amahan ug ni Jesukristo pinaagi sa pagsunod sa Ilang mga sugo (Josue 24:15; Mga Proverbio 29; 18; Juan 14:15; *BE*, kapitulo 35).

Tabangi ang mga bata nga mosag-ulo sa Juan 14:15. Isulat sa pisara *akong mapakita ang akong pasalamat ug paghigugma kon ako mosunod*, ug gamit og mga estasyon sa pagtudlo niini nga kamaturoan.

Estasyon1: Isaysay ang istorya ni Nephi nga namalik aron sa pagkuha sa mga palid (1 Nephi 3–4). Kantaha ang “Pangahas Pagbuhat sa Matarung” (*Mga Himno ug mga Awit sa mga Bata*, 64).

Estasyon2: Ipadrowing sa mga bata ang litrato sa usa ka sugo nga ilang gisunod, mopirma sa ilang pangalan sa ubos o sa luyo sa litrato, ug ibutang kini sa usa ka libro alang sa bishop.

Estasyon3: Isulat ang pulong nga *Pagpasalamat* sa pisara. Hangyoa ang mga bata sa paghunahuna og mga paagi sa pagpakita og pagpasalamat nga gisugdan sa matag letra sa pulong. Kantaha ang “Pangahas Pagbuhat sa Matarung” (*Mga Himno ug mga Awit sa mga Bata*, 64).

## TEMA SA DISYEMBRE

**Si Jesukristo nagpuyo dinhi sa yuta kaniadto, ug ako adunay hugot nga pagtuo nga Siya mobalik pag-usab.** “Kining maong Jesus, nga gikuha gikan kaninyo ngadto sa langit, mobalik ra unya sa paagi nga sama sa inyong nakita sa iyang pagsaka sa langit” (Mga Buhat 1:11).

### Sinemana nga Mga Baruganan sa Ebanghelyo

1. Ang karaang mga propeta nanagna sa pag-anhi sa Manluluwas nganhi sa yuta (Isaias 7:14; 9:6–7;

Helaman 14:2; “Jesukristo, mga Panagna mahitunogod sa,” *Giya ngadto sa mga Kasulatan*, p. 102; “Sa Layo nga mga Patag sa Judea” [*Mga Himno ug mga Awit sa mga Bata*, 52]).

2. Ang Manluluwas nga si Jesukristo mianhi sa yuta isip usa ka gamay nga bata nga natawo didto sa Bethlehem (Lucas 2:1–40; “Mahilum nga Gabii” [*Mga Himno ug mga Awit sa mga Bata*, 53]).
3. Makabaton ako og kalinaw, kalipay, ug gugma tungod sa pag-anhi ni Jesukristo (Mga Buhat 1:9–11; “Ang Ikaduhang Pag-anhi ni Jesukristo,” *BE*, kapitulo 43).

Ipakita ang PHE 216 ug basaha ang Mateo 19:13–15. Hisguti uban sa mga bata unsa kaha kon usa ka ka bata sa dihang si Jesus nagpuyo sa yuta. Kantaha ang “Samtang Nagbasa Anang Sugilanong Matahum” (*Mga Himno ug mga Awit sa mga Bata*, 60). Dayon ipakita ang PHE 322 ug ipabasa sa grupo sa mas gulang nga mga bata ang 3 Nephi 17:11–12, 21–24 pagdungan. Hisguti unsa kaha kon naapil pa sa grupo nga gipanalanginan ni Jesus. Kantaha ang “Samtang Nagbasa Anang Sugilanong Matahum” (*Mga Himno ug mga Awit sa mga Bata*, 60). Sa katapusan, ipakita ang PHE 238. Patindoga ang mga bata, ug sultihi sila nga sila ang mga bata karon. Hisguti unsa kaha kon maanaa sa atubangan ni Jesukristo.

4. Samtang ako nagsunod ni Jesukristo pinaagi sa hugot nga pagtuo, akong andamon ang akong kaugalingon alang sa Ikaduhang Pag-anhi (Mateo 25:1–13; D&P 45:56–59; 39:20–24).

Sultihi ang mga bata nga walay nasayud kon kanus-a mobalik pag-usab ang Manluluwas pero kon kita mosunod Kaniya pinaagi sa hugot nga pagtuo, makapangandam kita sa pagdawat Kaniya kon Siya moabut pag-usab. Ipakita ang mga litrato nga uban sa walo ka mga kanta gikan niining pasundayag sa mga bata sa sakrament miting karong tuiga. Ipatugtog sa piyanista ang pipila ka nota sa usa sa mga kanta, magdugang og usa ka nota kada higayon hangtud ang usa ka bata makaila niini. Hangyoa ang klase sa bata nga mongalan sa kanta, mopahaum niini sa litrato, ug mosulti og usa ka butang nga gitudlo sa kanta mahitungod sa pag-andam alang sa Ikaduhang Pag-anhi sa Manluluwas. Kantaha ang awit. Pagpamatuod niana nga baruganan, ug balika alang sa ubang mga kanta.

# MATINUD-ANON KO'NG MOSUNOD NIYA

Maisugon ♩ = 92-104

Mga pulong ug musika:  
Janice Kapp Perry, natawo 1938

1. Dios mi - pa - na - la - ngin ka - na - ko Nga ma - ka - kat - on sa ga - may pa 'ko. Pa - ma  
(2. Gi) - pa - ba - ti Ni - ya'ng 'Yang gug - ma. Na - kat - on ko sa pag - sa - lig Ni - ya. Ma - o

tu - od ko, i - pa - am - bit ko Kay ki - ni g'yud hus - to. Dios  
nga mag - bi - nu - o - tan gyud ko'g Mag - ma - ti - nud - a - non. Gi

mi - pa - na - la - ngin ka - na - ko. Kon a - ko mag - am - po, ma - lig - on ko. Mo - bu  
pa - na - la - ngi - nan ko Ni - ya. Sa pa - sa - la - mat day - gon ko Si - ya. I - sang

hat, mo - a - la - gad gyud a - ko. Mo - su - nod g'yud a - ko. 2. Gi -  
yaw ug i - pa - ma - tu - od ko Nga sun - don ko Si - ya. Ug sa

ti - bu - ok ko'ng ki - na - bu - hi, Sun - don ko gyud Si - ya.

© 2001 ni Janice Kapp Perry. Ang tanang mga katungod gigahin.  
Kini nga kanta mahimong kopyahon alang sa sulagma, dili pangnegosyo nga paggamit sa simbahan o panimalay.

*WORK SHEET SA PAGPLANO SA  
PANAHON SA PAGPAKIGBAHIN*

Petsa: \_\_\_\_\_

Binulan nga tema: \_\_\_\_\_

Sinemana nga Mga Baruganan sa Ebanghelyo: \_\_\_\_\_

\_\_\_\_\_

Unsaon nako sa pagtudlo og baruganan sa ebanghelyo?

Unsaon nako sa pagtudlo sa ebanghelyo ug paapilon ang mga bata?<0}

- Mga Kasulatan
  
- Mga kanta
  
- Mga paagi sa pagtudlo nga mopaapil sa mga bata

Unsaon nako pagtabang ang mga bata nga mogamit sa baruganan sa ebanghelyo sa ilang mga kinabuhi?

Panapos ug pagpamatuod

\_\_\_\_\_

Pagtimbang-timbang: Natuman ba nato ang unsay atong gustong mahitabo? Unsaon nato sa pagpalambo?

Pahibalo: Mahimong magpakopya kon gikinahanglan alang sa kapangulohan sa Primary ug mga magtutudlo.

## MGA PASUNDAYAG SA KLASE

Usa ka panahon sa pagpakigbahin sa usa ka bulan kinahanglan nga himoon nga pasundayag sa klase. Kahigayunan kini alang sa mga bata sa inyong klase sa pagtudlo sa baruganan sa ebanghelyo ngadto sa uban. Ang kasinatian makapalig-on sa mga baruganan nga imong gitudlo ug motugot sa mga bata aron makaangkon og pagsalig samtang sila moapil sa pasundayag sa grupo.

- Ang mga magtutudlo ug mga miyembro sa klase magplano ug magpakita sa pasundayag sa klase.
- Ang pasundayag kinahanglang mosuporta sa usa sa sinemana nga mga baruganan sa ebanghelyo alang niana ng bulan.
- Maanindot nga mga paagi sa pagtudlo sa ebanghelyo anaa sa *Teaching No Greater Call* nga gilista sa ubos.
- Ang kapangulohan sa Primary ug lider sa musika kinahanglan nga anaa aron sa pagtabang sa klase kon gikinahanglan.

## MGA PAAGI SA PAGTUDLO

Ang mosunod mao ang lista sa mga paagi nga mahimong magamit sa pagtudlo og baruganan sa ebanghelyo ug pagpaapil sa mga bata sa panahon sa pagpakigbahin.

<i>Audiovisual</i> nga mga Materyal	Kalihokan ginamit ang mga Bersikulo	Mga Pagtandi ug Praktikal nga Paghulagway sa mga Leksyon
Mga Biswal	Mga Kalihokan sa Pagdrowing	Mga panaghisgutan
<i>Brainstorming</i>	Mga Kasulatan	<i>Panel Discussions</i>
Dinapit nga mga Mamumulong	<i>Lectures</i>	Pang-atensyon nga mga Kalihokan
<i>Dioramas</i>	Mga Litrato	Mga Pangutana
Mga Drama	Mga Mapa	<i>Paper Stand-Up Figures</i>
Mga Dula	Musika	Mga Pasundayag [ <i>Demonstrations</i> ]
Mga Ehemplo	Musika nga may Saysay	Mga Pisara
Mga Estasyon	<i>Overhead Projectors</i>	Mga <i>Puppet</i>
<i>Flannel Boards</i>	Mga Paagi sa Paggamit	<i>Readers' Theaters</i>
Ginagmayng Grupo nga Paghigot og Hilisgutan [ <i>Buzz Sessions</i> ]	Mga Pagbasa og Dungan	<i>Role Playing</i>
Hitabong mga Tun-anan [ <i>Case Studies</i> ]	Pagmemorya	<i>Roller Boxes</i>
Mga Istorya	Pagpahisama	<i>Work Sheets</i>
	Mga Pag- <i>recite</i>	

Ang tinuig nga *outline* alang sa panahon sa pagpakigbahin ug ang pasundayag sa mga bata sa sakrament miting anaa sa opisyal nga *website* sa Simbahan nga [www.lds.org](http://www.lds.org).

ANG SIMBAHAN NI  
**JESUKRISTO**  
SA MGA SANTOS  
SA ULAHING MGA ADLAW

CEBUANO

